

Per tschintg onns an mangs grischuns



Prest 8000 persungas on persequito igl til da festa tras Coira.

Foto Olivia Aebli-Item/Somedia

Gion Nutegn Stgier/FMR

Tradiziun, collegialitad, plascheir communabel da sagettar e cultura svizra. Chegl è ena versiun curta digl til dalla Festa da teir federala 2026. Dalla parteida è stada blera prominenza politica, tranter oter er cunsiglier federal Martin Pfister.

Anc cozza l'occurrentza da teir naziunala treis emdas, ma egna dallas culminaziuns dalla festa da teir federala è stada sonda passada ainten la capitala grischuna. Chegl è igl de uffizial ed igl til da festa tras Coira cun blers bels motivs, numerosas calours, varsaquantas persungas dalla politica naziunala, cantunala e regiunala, musica, bandieras sainza fegn ed ena rotscha da tiradours e tiradours dall'antiera Svizra. 1000 participants e participantas on preschento en tung e tung, en maletg ed en costum, pompous e grondious, usits, tradiziuns, culturas ed alloura sa tgapescha er igl teir. Per lung dalla veia digl til ò blera gliout, prest 8000 persungas, persequito l'occurrentza e catto blers muteivs per fotografar ed admirar. Onour agls organisa-

tours dalla Festa da teir federala 2026 on alloura er fatg numerosas associaziuns da teir cantunales e schizont uniuns da teir digl exteriour, societads da teir svizras da ples teras dall'Europa, digls Stadis Unias dall'America, digl Canada e dall'Africa digl Sid. Per tschintg onns resta la bandiera dall'associaziun aint igl Grischun. Igl act festiv ò gia li sonda avantmezde ainten la Obere Au a Coira cun la surdada dalla bandiera dall'Associaziun svizra da teir. Siva digl 2020 è chella stada an mangs digl comite d'organisaziun dalla davosa Festa da teir federala a Lucerna.

Attilio Tam è igl nov bandirel

Agl act da festa è neidas a pled ples persungas. Chegl è igl cunsiglier naziunal Martin Candinas tgi stat alla testa digl comite d'organisaziun dalla Festa da teir federala actuala aint igl Grischun. Er alloura on cunsiglier federal Martin Pfister, Stefan Engler, president digl cunsegl digls cantuns e Pierre-André Page, president digl cunsegl naziunal, discurreia alla gronda raspada. Igl saleid dalla regenza grischuna è nia da cunsiglier guvernativ Martin Bühler. Bandiera è pigls proxims tschintg onns cun Attilio Tam, en tiradour cun corp ed

olma tgi vign da Malögia. La proxima festa da teir federala duess aveir li an quatter onns aint igl cantun Vad u aint igl cantun Neuchâtel.

Magari scu er tar la politica

Cunsiglier federal Martin Pfister ò detg tgi las festas federalas da teir totgan tar l'architectura dalla Svizra. Igl giast da Berna ò er menziuno la valeta digl teir, da tiradours e tiradours per l'armada Svizra. Martin Candinas ò ludo an spezial igls 5000 voluntaris tgi prestan la-vour exemplarica e tgi on igl pi grond maret tgi l'occurrentza da teir naziunala seia en success. Stefan Engler, igl president digl cunsegl digls cantuns, admeira cunzont la attaschedad e la cumpagneia tranter igls tiradours e las tiradours. Er sen camp politic dastga chegl betg mantger, ò detg igl politicher da Surava. Per aveir success aint igl teir dovrigl bagn er en tschert cletg, chegl tgi ins dastga er attribueir alla politica. Stefan Engler è cunzont sto incanto dalla cerimonia dalla surdada dallas bandieras. El seia ainten chella tgossa en veir tradizionalist. Digl reminent è el sto igl 1992 commember digl comite d'organisaziun dalla Festa da teir cantunala 1992 aint igl Grischun Central.